

Date – 26/02/2025

Time - 18:30 -18:40Hrs

REGIONAL NEWS BULLETIN

HEADLINES (EVENING)

1. Mizoram sorkar chuan department 29-te mamawh bik enkawlna leh hnathawhna atan Finance Commission 16-na lo zin hnenah cheng vaibelchhe 7,541 leh nuai 93 a lo dil.
2. NITI Aayog member Dr Vinod Kumar Paul chuan natna hmuhchhuah hma hi hriselna lam leh damlo enkawlna atana thil pawimawh tawpkhawk a ni, a ti.
3. Khawvela sakhaw thila intawhkhawm lian ber Maha Kumbh chu vawiin khan Prayagraj ah khar a ni.
4. Prasar Bharati Chariman Navneet Sehgal chuan Akashvani chuan ramchung mipuite hnam ziarang leh nunphung inhriattawna leh inpawh tlannaah a thawh hlawk hle a ti.

<><><>

MIZORAM PLEAS TO FC

Mizoram sorkar chuan department 29-te mamawh bik enkawlna leh hnathawhna atan Finance Commission 16-na lo zin hnenah cheng vaibelchhe 7,541 leh nuai 93 a lo dil.

Finance department-in Finance Commission 16-na lo zin lai a an lo dil hi state specific needs under various department tiin an vuah a. PWD hnuaiah cheng vaibelchhe 1,581 leh nuai 1 dilin department zinga dil tam ber a ni a, a dawtah health & family welfare hnuaiah cheng vaibelchhe 832 leh nuai 65 dil a ni a, a pathumna chu district council & minority affairs tana cheng vaibelchhe 688 leh nuai 83 dil hi a ni. Department tana an dil tlem ber chu SCERT tana cheng vaibelchhe 1 leh nuai 24 a ni. Mizoram sorkar chuan Finance commission lo zin hnenah hian tuna chhiah tling khawm atanga central sorkarin za zela 59 a chang a, state sorkarin za zela 41 a chang hi inzat a insem ni se tiin rawtna an lo thlen a. Hei bakah hian finance commission 15-na a tehfunga hman loh, United Nations Sustainable Development Goals leh mipui nitin mamawh man to dan a zira za zela 7 point 12 ve ve sum pek dan tur tehfunga hman ni se tiin rawtna a lo siam bawk a. Chhiatna thlenga state

disaster respond fund-in a huam tel loh, kangmei leh leimin vanga chhiatna pawh huam teltir ni se tiin Mizoram sorkar chuan a lo rawt bawk a ni.

Finance commission 15-na khan tehfung hrang hrang a siamah 'income distance' an tih mai kum khata mitin sum lakluh hniamna state tan za zela 45 a hmang a. State a mihring tam zawnga zir kha za zela 15 niin, a state zau zawng pawh za zela 15 hman a ni a. Ram ngaw neih zau khan mark 10 a pu a, mihring chengte pun chak leh chak lohin mark 12 point 5 a pu bawk. State sorkar sum enkawl dan tha leh tha lo tehna atan mark 2 leh point 5 tehfungah a hmang bawk a ni.

Finance commission 16-na chairman Dr. Arvind Panagariya hian nimin khan Falkawna ZMC & hospital tlawhna a a tel hnu-in Mizoram chhuahsanin Delhi a pan a. Member-te leh official engemaw zat chu la chamin nizan khan Thenzawlah an riak a, Serchhip district bawrhsap Pu Paul L. Khuma'n zanriah a buatsaih saka Mizo ziarang lang thei tura intihhlimna hun buatsaih a ni a, waviin khan helicopter hmangin Serchhip atanga Lengpui tumhmun thlengin Delhi-ah an chhuk leh ta a ni.

<><><>

ASSEMBLY-WATER PUMP

Aizawl khawpui tui lakna khawlte hi tui lianin a chim theih tawh lohna turin PHE Department in ruahmanna a siam mek niin PHE minister Prof. Lalnilawma chuan Assembly a hrilh.

Rorellai ZPM member Pu Lalchhuanthanga zawhna chhangin PHE minister chuan Tlawng lui atanga tui pump chhohna Vertical Turbine Pump House, Clear Water Pump House, Duty Room, Clear Water Sump te hi tuna an awmna atanga metres 2 point 7 atanga metre 3 a sangah chawisan vek tum a ni, a ti.

Rorellai member tho Pu Lalramliana Papua zawhna chhangin Prof. Lalnilawma chuan JJM hnuiaia thingtlang lama tui thianghlim laksak hna te zawh fel tawh an ni hlawm a. Amaherawhchu, Sorkar laipui atanga hnathawhna pawisa dawn kim a la nih loh avangin hnathawktu – Contractor leh Supplier pawisa eng emaw zat bat sak a la ni a. Khuarel chhiatna leh chhan dang vanga hmelhem, siamthat leh tih changtlun belh ngai thil thenkhat a awm a, hengte hi pawisa a awm hunah chul mam leh a ni ang a ti.

<><><>

NITI AAYOG MEMBER

NITI Aayog member Dr Vinod Kumar Paul chuan natna hmuhchhuah hma hi hriselna lam leh damlo enkawlana atana thil pawimawh tawpkhawk a ni, a ti.

Zoram Medical College & Hospital-in an hnathawh an enletna hun hmanpui-in zan khat riaka Mizorama rawn zin NITI Aayog member chuan hriselna kawnga thawhna chuan mitin a thleng pha tur a ni a, chu mi atan chuan primary health centre te, wellness centre te leh health sub centre te tihchangtluna thuam that a ngai a ni a ti. Mipui hriselna lam atana thawktute chu kum 3 emaw kum 4 chhung vela ngawr natna, sikserh, phar natna, German sentut (rubella) leh sentut (measles) te tibo tura nasa leh zuala tan la turin a sawm a ni.

He inkhawmah hian Health Minister Pi Lalrinpuui, Principal Economic Director Anna Roy, NEC Economic Advisor Sherry Lalthangzo te an tel a. ZMC&H thuneitute chuan Dr. Paul hnenah hian an mamawh hrang hrangte an lo thlen a. Chu’ng zingah chuan kum 2025-2026 session chhunga Master of Medicine leh Master of Surgery class hawn phalnate, Mizorama doctor indaih lohna sutkianta a tel a. Ministry of Health & Family Welfare a ZMC&H tihchangtlunna atana cheng vaibelchhe 313 leh nuai 84 dil mek pek chhuah thuai ni se an duh thute an sawi bawk a ni.

<><><>

POOR FEDERATION

Mizoram Poor Federation chuan khawtinah miretheite’n an chanvo tur dik tak changa, an sum lakluh ang zela an awmna tur theuh Ration Card-ah an awm theihna’n hmalak an tum

He thu hi vawiin khan Aizawl Press Club-ah Mizoram Poor Federation hruaitute chuan chanchinbumite an kawmna-ah sawiin, Mizoram Poor Federation President Pu Lawmthanga chuan Supply Minister Pu B Lalchanzova pawh hemi chungchang hi lo sawipui tawh thu leh amah leh sorkar tawiawm tura sawmna an dawn angin Champhai District-ah bul tanin mirethei ten an chanvo tur dik tak Ration Card-ah an awm ngei em tih finfiah turin an che chhuak dawn tih a sawi a ni.

Pu Lawmthanga chuan khawsakna dinhmun a zira Ration Card eng emaw a pawla awm tur ni si, Ration Card vara awmte leh Ration Card vara awm tur ni tawh awm tak Ration Card eng/pawla awmte pawh an la awm thei niin a sawi a. Mipui-in an sum lakluh leh khawsak dinhmun ang zela an nihna dik tak Ration Card an neih hi a thianghlim a, khawsak dinhmun a zira Card eng/pawl atanga Card vara insawn hian Mi harsa zawkte tan hmun an kian tih hriat a tul thu a sawi a ni.

Ration buhfai dahna buara chungchangah sawrkarin hma thar la-in, ration buhfai latu ten buhfai an lak zat tur dik tak leh buktling ngeia an lak theih na’n kudamah Buara rihna gram 580 hi an paih nghal a. Retailer-in buara rihna hi buhfai atangin an Cut a rem tawh lo a, buhfai latu ten buhfai an lak tur zat dik tak leh buk tling an lak theih nan sorkarin ruahmanna a siam hi a tul dan ang zelin an bawhzui dawn tih an sawi bawk a ni.

<><><>

GINGER - MAMIT

Mamit district chhungah Sawhthing hralh chhuah mek a ni a, tunah sawhthing quintal 403 leh kg 46 hralh chhuah a ni tawh.

Mamit district ah hian Sawhthing hralhna/leina hmun 6 - Mamit, Kanghmun, Reiek, Rawpuichhip, W Phaileng, leh Tuidam ah te awmin heng hmun atangte hian sawhthing hralh/lei thin tura ruahman a ni a. Zirtawpni kalta (February ni 21) khan Mamit district a a hmasa ber atan Kanghmum a dahkhawmna hmunah sawhthing hralh tan niin sawhthing quintal 214 hralh/lei a ni a, nimin khan dah khawmna hmun dang Mamit ah quintal 97, W Phaileng ah quintal 86 leh kg 24 leh Tuidamah quintal 6 leh kg 22 te hralh a ni a, Rawpuichhip leh Reiek-ah erawh sawhthing hi buk/hralh chhuah a la ni lo thung a ni.

Sorkar hotute chuan district dang aiin Mamit district-ah hian sawhthing ling an tlem zawk a a lan thu leh sawhthing lingtu tam takte chuan sawhthing chu cho a hralh nghal mai lovin a chi atan an la dah avangin Mamit district chhungah sawhthing quintal sing khat vel bak hralh chhuah theih an beisei loh thu an sawi a ni.



MIZORAM-ASSAM TALKS

Ramri buai chungchangah Mizoram leh Assam sorkar official-te chuan March thla tawp lama inbe turin ruahmanna an siam.

Home secretary Pu Vanlalmawi-a'n Akashvani Aizawl a hrilh danin official-te inbiakna atana rawtna an siam vawi 3 lai Assam sorkar hnena an thlen chu Thawhtanni khan Assam home department chuan a rawn chhang ta hram a. Assam sorkar hian March thla tawp lamah state pahnih official-te inbiak ni se tiin rawtna an rawn siam a. Hei hi Mizoram sorkarin a ngaihtuah ve-in thutlukna a siam dawn a. Nikum August ni 9 a Aizawl a home minister Pu K. Sapdanga ho Mizoram aiawhte leh Assam border protection & development minister Pu Atul Bora kaihhruai Assam sorkar aiawhte inbiak tuma March ni 31, 2025 hma ngeiin Guwahati ah minister pahnihte'n inbiakna chhunzawm se ti a thu an dah chu tihpuitlin theih a ni dawn ta lo ni-in a lang a ni.

Mizoram sorkar hian minister level-a inbiak hma hian an inbiakna tur atana kawng lo sial lawk a, ram inchuh chungchang hi state pahnih official-te'n chipchiar taka lo sawiho phawt ni se tih an rawt reng a. Assam sorkar lamin chhanna an rawn pek mai loh avangin inbiak hun a khawtlai ta niin home department hotute chuan an sawi a ni.

Puan tawh thin angin July ni 26, 2021-a Vairengte dai a Mizoram leh Assam Police-in silai an hmehpuah avang khan Assam Police mi 5 an thi a. Hetiang a inthenawm state 2 inkara ramri buai avanga tharum thawhna lian tham a thlen tak avang hian Assam sorkar chuan Pu Atul Bora leh official dangte rawn tirin khatih lai a home minister Pu Lalchamliana kaihhruai Mizoram aiawhte nen August 2021 khan Aizawl-ah ramri chungchang inbiakna hmasa ber buatsaih a ni a. Hemi hnu hian sorkar hmasa hun lai khan Aizawl leh Guwahati-ah minister-te hi vawi khat ve ve inbe zui-in ZPM sorkar a lo pian hnu-ah nikum August thla khan Aizawlah minister 2-te an inbe leh a ni. CM hlui Pu Zoramthanga leh Assam CM Pu Himanta Biswa Sarma te pawh Delhi-ah vawi 2 an inbe tawh bawk.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihtlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.



MAHA KUMBH

Khawvela sakhaw thila intawhkhawm lian ber Maha Kumbh chu vawiin khan Prayagraj ah khar a ni. Ramchhung hmun hrang hrang atanga sakhaw biakzina kalten tukin khan Sangam ah an inchiah thianghlim a ni. Maha Kumbh Mela hi January ni 13 atang khan tan a ni a. Kar ruk chhungin mi vaibelchhe 64 leh nuai 60 chuangin Mahakumbh hi an tlawh a. Khawvela mihring punkhawmna lian ber a ni.



PRASAR BHARATI.

Prasar Bharati Chariman Navneet Sehgal chuan Akashvani chuan ramchung mipuite hnam ziarang leh nunphung inhriattawwna leh inpawh tlannaah a thawh hlawk hle a ti. Vawiina Mahakumbh tawp nia a thuchahah Pu Sehgal-a chuan ni 48 an tihchhuah chhungin Akashvani Kumbhvani chuan mi tam tak nun a khawih a ni a ti.

Prasar Bharati CEO Gaurav Dwivedi pahwin Akashvani Kumbwani channel chuan Mahakumbh chanchin tihchhuah kawngah an thawk tha hle a ti a. Akashvani chuan mipuite hnena thu leh hla thehdarhtu a nihna chu tlin takin a thawk a ti a. Mahakumbh chuan mipuite nuna thil tam tak a khawih tih sawiin mi thinlungah a chang thuk em em a ni a ti bawk.

